

Sisimiut Kangerlussuullu akornanni aqqusinermik qimuttuitsulluunniit aqquataannik pilersitsisoqassagaluarpat inuussutissarsiornikkut periarfissat suut pilersinneqarsinnaanersut pillugit apeqquteqaat aallaavigalugu oqallisissiaq.
(Inatsisartuni ilaasortaq Peter Olsen, Inuit Ataqatigiit)

Akissuteqaat

(Inuussutissarsiornermut Nukissiuuteqarnermullu Naalakkersuisoq)

Oqallisissiatut siunnersuut

Sisimiut Kangerlussuullu akornanni aqqusinermik qimuttuitsulluunniit aqquataannik pilersitsisoqassagaluarpat inuussutissarsiornikkut periarfissat suut pilersinneqarsinnaanersut pillugit sammisaqartitsineranut Inuit Ataqatigiinnit Inatsisartuni ilaasortamut Peter Olsenimut qujanaq.

Sisimiut Kangerlussuullu akornanni aqquserngup nunap immikkoortuaneereersunik inuussutissarsiornikkut takornariartitsinermilu suliarpassuit tapersersorsinnaavai.

Ullumikkut Qeqqata Kommuniani sukisaarsaatigalugu aalisarnermut aamma tammajuitsussarsiorluni piniarnermut akuersissutit amerlasuupilussuit nalunaarutigineqarsimapput.

Kangerlussuup Sisimiullu akornanni aqqusinermut atasutut inuussutissarsiorfimmi takornariartitsinermilu suliniutinik amerlanernik ineriartortitsisoqarsinnaassasoq Naalakkersuisut nalilersuutigaat.

Aqqutikitsumi aamma Ungalliup Qaqa-ni sisorartartunut takornariartitsinermik pilersitsisinnaaneq pillugu Naalakkersuisoqarfigisama, Qeqqata Kommuniata aamma namminersortutut soqutigisaqatigiit akornanni piffissap ilaani oqaloqatiginnittoqarsimavoq.

Tamatumalu nangitsigisaanik kommunip sumiiffimmi akuersissuteqarfissatut sumiiffinnut kommunip pilersaarutaanut tapiliup tamanut ammasumik tusarniaassutigisimavaa. Kommuniup pilersaarutaanut tapiliummik kommune akuersissuteqassappat sumiiffimmi

takornariartitsinermik akuersissutinik tamanut ammasumik neqerooruteqartitsinermik Naalakkersuisut aallarnisaassapput.

Sisorartartunut takornariartitsinerup saniatigut sumiiffik takornariartitsinermi inuussutissarsiorfinnilu suliarisanut allarpassuarnut atorneqarsinnaassaaq, taakkunanit ilaatigut qimussernermut, snescooterernermut, mountainbikernermit, sukisaarsaatigalugu aalisarnermut, qajartornermut allarpassuarnullu atasunik misigisassat eqqaaneqarsinnaallutik.

Nunap immikkoortortaata takornariartitsinermut piukkunnaatai Aasivissuit-Nipisap UNESCO-mi nunarsuarmi kingornussassaqaarfittut toqqarneqarneranit suli annermik tapersorsorneqarpoq. Assersuutigalugu misigisassarsiorluni takornariartitsinermut UNESCO-mit sumiiffik toqqagaasimasooq assupilussuaq soqutiginaateqassaaq, tamaani pinngortitaq kultureqarnermilu oqaluttuarisaaneq pissanganartuusut misigisassaqaarfiusinnaallutik.

Tamakku saniatigut Sisimiut Kangerlussuullu akornanni aqquserngup kommunimi inuussutissarsiorfimmi suliarisat suli qaninninngortissinnaavai. Assersuutigalugu aatsitassarsiornermik suliniutini nutaani najukkamit suliffeqarfiit sulisartullu ilanngutsitaanissaat oqinnerulertussaassaaq. Aqquserngup sananeratigut taamatuttaaq nunap naasuinik, nerisassiornermi akuutissanik, tiiliarineqarsinnaasunik il.il. tunisassiarineqarsinnaasunik periarfissiissaaq.

Aammattaaq siunnersuuteqartup eqqaasaanik inuussutissarsiorfimmi periarfissarpassuit allat tapersorsornissaannut Naalakkersuisut aamma ilapittuuteqarusooqat.

Tassunga atatillugu namminersortutut pilersitsisartunut atugassinneqartartut inuussutissarsiorfimmik ineriartortitsinissamut ingerlattakkat agguaassassallu taakkartorneqassapput. Taamaalilluni tunisassianik ineriartortitsinernut, avammut nioqquteqarnermut tapiissutinik, inuussutissarsiuutigisatut siunnersuisartunit ikiorserneqarnermut tapiissutinik, kalaallit nerisassaataannik, takornariartitsinermut il.il. aningaasaliissutinik Greenland Business agguaassisinnaavoq. Tamakkulu saniatigut aningaasanut inatsit aqquutigalugu nunaqarfinni isorliunerusunilu piviusutut inuutissarsiorfimmi suliniutinut aningaasaliissutit agguataarneqartarput.

Tamatuma saniatigut Naalakkersuisut aqquserngup pilersinneqarnissaata toqqammavissinnissaanut periarfissaqarput suliffissarsiorfittut pikkorissaanernik piginnaanngorsaasunik angusassamillu toraagalinnik neqerooruteqarnikkut, inuit taakku taamaalillutik suliniutip suliarineranut ilanngunneqarsinnaanngortillugit. Piginnaanerit najukkami pigineqanngippata taava nuttarnersitsiniarluni aningaasaliissutinik

qinnuteqarnissaq periarfissaavoq, taamaalillunilu nunap ilaani allani suliffissarsiortut sulisussarsiorfiusunut nuussinnaalersillugit.

Naalakkersuisooqatigiittut partitit aamma demokraatit akornanni angallanneq assartuisarnerlu pillugit isumaqatigiisummi takuneqarsinnaasutut isumaqatigiisummi illua'tungeriit Sisimiut Kangerlussuullu akornanni aqqusinniornermut tunngatillugu Qeqqata Kommuniarip oqaloqateqarnissaminnut piareersimapput. Nassuiakkatulli sumiiffimmi aallartisarneqarsinnaasutut inuutissarsiorfimmi periarfissanik nutaanik Naalakkersuisut suliaqarfigalugu tapersersuiniarput. Aqqusineq pillugu suliaqarneq Ineqarnermut Attaveqatigiinnermullu Naalakkersuisup aamma Qeqqata Kommuniata pilersitaannit suleqatigiissitami ingerlanneqarpoq. Tassunga atatillugu aningaasanut inatsimmi tamatumunnga aningaasaliissutissanik immikkoortitsisoqarsimanngimmat aningaasaliinissamut pisariaqartitsinerit periarfissallu aamma qaammarsaavigineqassapput.

Naalakkersuisut sinnerlugit Inatsisartut oqallilluarnissaannik kissaappakka.